

AKASHVANI AIZAWL
REGIONAL NEWS BULLETIN

HEADLINES (EVENING)

- 1. Rajya Sabha MP, Pu K Laltluangkima chuan, tuna Mizoramin a mamawh hmasaber nia a hriat chu, 'kawngpui tha neih' a ni, a ti .
- 2. MLA Pu K Hrahmo, BJP Mizoram State Core Group Member chuan Autonomous District Council te'n Sum lama harsatna an tawh chhan bulpui ber chu ZPM Sorkarin ADC-te a duhsak loh vang a ti.
- 3. Prime Minister Narendra Modia chuan vawiin khan SCO Summit karlakah Islamic Republic of Iran President Masoud Pezeshkian a kawm.
- 4. Nepal tuilian avanga thi zat chu 903 an tling tawh a. Mi 4247 chin hriatlohin an la awm

<><><>

RS MP

Rajya Sabha MP, Pu K Laltluangkima chuan, tuna Mizoramin a mamawh hmasaber nia a hriat chu, 'kawngpui tha neih' a ni, a ti a. Hemi piah lamah hian Mizoten India ram leh khawvel hmun dangah zau zawka inphochhuah tam an mamawh a, India-a hnam hrang hrang zingah Mizote danglam bikna chu an hman tangkai a, khualzin hipna atan an hman tangkai thiam a pawimawh tih a sawi.

He thu hi vawiin Aizawl Press Club a tlawhnaah sawiin, Rajya Sabha MP chuan, India ram rorelna sang ber Parliament House-a Mizoram aiawhtu MP ten Mizoramah Office an nei lo chu thalo a tih thu a sawi a. MP-te chu Mizoram mipui aiawh an ni a, anmahni dawr duh leh thu thlen duh tamtak an awm ve avangin, chuti ang mite lo dawnawna tur Pisa mumal tak an neih tula a hriat thu a sawi a. Hemi chungchang hi Chief Minister a sawipui tawh thu leh, a hlawhtlin ngei pawh a beisei thu a sawi.

MP ten Quarster an nei loh pawh thil dik a nihloh avangin, Quarters sak a nih theih nan sorkar laipui lama hmalak a tum thu Pu K Laltluangkima hian a sawi baw.

Rajya Sabha MP chuan Mizoram chu kawng hrang hrangah State dang aini a hnufual a. Hei hi a chhan chu hnathawh phung a that tawh loh vang te, a enkawl zuina that tawh loh vangte a ni tih sawiin, hna tha a awm theihna tura hmalak chu thil tihmakmawh a ni, a ti.

ZPM kaihhruai sorkarin Mizoramah hmasawna hnathawh hrang hrang endiktu tur a din chu duhtusam ni chiah lo mah se, thil tha tak a ni, a ti a. Tun aia nasa zawka hmalak zel ni se a duhawm hle, a ti.

Mizoram chuan State dangte tana hriat atan chanchin duhawm leh mawi tak tak an nei nual tih sawiin, eirukna tlemna anih thu te, sorkar hnathawh aikal lak tihtawp te, zia leh chhiar thiam tamna a ni te chu thil lawmawm tak a ni, a ti.

((Corr - Nuteii))

<><><>

SMART METER MEETING

Power & Electricity Minister Pu F Rodinglana hovin a Office Chamber-ah RDSS Scheme hnuaia Smart Meter vuah mek chungchang hmalakna leh harsatnate an sawihova.

He meeting-ah hian smart meter hman ngei ngei a ngaihchhante tarlan niin, India ramah electric kal ral tam tham tak tihhniamna turin, Ministry of Power chuan RDSS: Loss Reduction Scheme a duang chhuak a, he scheme hnuaiah hian Smart Meter vuah runpui chu ram pumah neih a ni ta a ni an ti a,

He meeting-ah hian Smart Meter vuah a pawimawhzia pawh sawiho niin, Mizoramah hian electric consumer 3,20,000 vel an awm a, chung zinga 34,300 vel chu meter chhia a ni a. Heng bakah hian meter engemawzat chu electric hman dan teh dik tawh loh a awm ngei tih hriat a ni bawh. Hengte avang hian Mizoram chhungah electric kal ral tam tak a awm phah a, he loss tihnam tur hian Central Sorkar hmalakna zarah smart meter vuah hna chu Mizoramah pawh thawh a ni ve ta a ni an ti.

Tun dinhmunah smart meter 82,000 vel vuah tawh a ni a, smart meter vuah tawhte zingah vuah thar tirh a bill tam deuh zaa 24.67 vel an awm a, a hnua a tam chhunzawm chuanglo a; chutihrualin, bill tlem zawk pawh zaa 30.24 lai an awm ve bawh tih vawiin meeting ah hian tarlan a ni.

Meetinga tarlan anih danin, Mizoram-a hman tur smart meter reng reng phurhchhuah a nih hmian laboratory-ah a dik ngei a ni tih finfiah vek a ni a, he fiahna ah hian Mizoram aiawhin P&E Department Engineer-te an tel ziah a. Heng bakah hian laboratory-a test paltlang tawh te zinga engemaw zat chu a dik zia finfiah nan National Accreditation Board for Testing and Calibration Laboratory ah test leh thlap a ni a, heng finfiahna zawng zawng paltlang hnua chauh Mizoram-ah phurh chhuah a ni thin. Vuah hnua meter chu a lo dik tawh lo emaw, manufacturing defect engemaw a awm a nih chuan meter number atangin laboratory-a test dan kim chang chhui let leh vek theih a ni bawh.

(DIPR)

<><><>

HLIMEN NGO

Hlimen Local Council leh All NGO’s chuan Directorate of Local Administration, Rural Development & Administration Department hnuaia awm mek Lalsavunga Park enkawl a nih dan chungchanga sorkara an thil phut te a hlawhtlin tak loh avangin naktuk atangin Lalsavunga Park chu tiam chin awm loin tlawh theih lohin an dan tur thu an sawi.

Lalsavunga Park enkawl dan chungchanga lungawilohna hi August 11 khan Press Release an lo tichhuak tawh a. Chuta an thuchhuah angin, naktuk atang khian Lalsavunga Park hi tiamchin awm lovin an dang dawn a ni.

Lalsavunga Park enkawltu hi a contract cancel ngei ni rawh se tih chu khawtlang hruaitute leh mipuite duhdan a la ni reng a ni an ti a, Khawtlang mipui te leh Park tlawh tumtute hriatthiam turin an ngen bawh.

Byte-
(Hruaia Aizawl PTC))

<><><>

BJP MIZORAM

MLA Pu K Hrahmo, BJP Mizoram State Core Group Member chuan Autonomous District Council pathumte'n Sum lama harsatna an tawh chhan bulpui ber chu ZPM Sorkarin ADC-te a duhsak loh vang leh an thutiam an hlen loh vang a ni a ti.

Vawiin khan an party Office Aizawlah thu sawiin Pu Hrahmo chuan Mizorama mihring cheng zat zinga zaa 17 chu ADC huamchhungah awmin, Mizoram Sorkar Budget atanga ADC-ten an chan ve chu Sorkar hmasa te ang lo takin zaa 4 chiah a ni a, hei hian ADC mipuite ZPM Sorkarin a duhsak loh zia a lantir a ni a ti.

Pu Hrahmo chuan Sawkar hmasa lamah District Council pathumte hian sum leh pai pawh Revise Estimate ai tam dawng thin-in kumtin pek an nih thin thu a sawi a, ZPM sorkarah erawh Finance Commission rawtna aia tam pek theih a nih tawh loh avangin Revise Estimate pawn pek anih tawh loh thu a sawi a, ADC MDC- te hlawh leh Ex-MDC Pension hlawh pawh an sum neih sa

aṭangin an inpe ve nghal a, Mizoram Sorkar chuan Kum 2024 leh 2025 ah pawh RE hi an pe duh lova, chumi anih avangin ADC pathum te hian Sum tam tak an bat phah ta a ni a ti.

ADC MDC-te hlawh leh Ex-MDC Pension hlawh pek tur hi Mizoram Sorkar in Order chhuah lo se hlawh pung an inpe lovanga, Mizoram Gazette Order meuh a awm avanga an sum neih sa hmanga hlawh an pek avangin sum an bat phah a, ZPM Sorkar hian an thutiam hlen nise ADC te hian sum harsatna em em an tawk dawn lo a ni a ti.

He Hrahmo chuan tun hnaia Chief Minister-in Siaha DC Office a hawanna-a a thusawi chu a dik tâwk lo hle tih sawi bawkin, a dik lo tih chu Mizoram mipuite hriat ah a puang a ni a ti a, Chief Minister hi tu te nge thu dik lo hrilh ṭhin anga, thu dik tâwk lo sawi tir ṭhin ni ang tih chu a zawhna a ni a ti.

((Hruaia Aizawl PTC))

<><><>

MZP

Mizo Zirlai Pawl MZP chuan Mizoram-a Central Institution hrang hrangah fello taka hnathawk tur lak tumna a awm thin chu a dem tak zet a, hetiang thil hi Mizoramah a thlen a phal ngai dawn lova, a do zel dawn tih an pawl President Dr C Lalremruatan a sawi.

He thu hi vawiin-a Federal Council Vawi 61 na an hmanna-ah sawiin, MZP President chuan tun hnaia NIT Mizoram Registrar lak tur Advertisement kal mek-ah fello taka hnalak a awm loh nan MZP chuan ngun takin a enzui dawn a ti a, Special Intensive Revision (SIR), Election Commission of India (ECI)-in a kalpui mek chungchangah, MZP chuan SIR 2005–2026 Electoral Roll inkara Chakma punna chu zirchiangin, ECI-in Final Roll a tihchhuah thlengin a enzui zel dawn a a ti bawk.

<><><>

MNF

MNF Thalai President Pu Gogo Lalremtluanga chuan tun hnaia Chief Minister Pu Lalduhoma'n Memorandum of Settlement/ Peace Accord chungchânga debate a rawt chu MNF Ṭhalaite'n lawm taka an pawm thu sawiin a ni atân October ni 2 ni se, Live telecast a chhuah ni bawk se a ti.

Vawiin khan MNF Hnam Run-a MNYF ten' inkhawm an kaihhruainah Pu Gogo-a chuan thusawiin, Zoram mipuite tâna ni pawimawh tak leh chhinchhiah tlâk tak, August ni 5, 1986-a Parliament House-a State of Mizoram Bill sawi honaa tel ve anga Chief Minister Pu Lalduhoma'n Assembly House-a a insawi chu thu dik lo a ni a ti a, Chief Minister berin Mizoram rorelna in sâng ber Assembly House-a thudiklo a sawi leh mai ṭhin chu amah thlang tlingtute leh Zoram mipui zah lohna leh hmuhsitna a ni a ti.

MNYF President chuan MNF party chu kum 65 chhung Mizo Hnam Meichher mit loa vawiin thlenga chelh ding tlattu, party nghelngheet leh rulhrel nghet tak nei a ni a ti a, hetihlai hian hun danglam zel mila insiamrem a ngai a, fel lo laite, siamrem leh siamṭhat ngaite siamṭhaa, MIZO NATIONALISM THA nen – Mizo Hnam Movement bul ṭan ṭhat a ngai a ti a. Mizo mipuite'n enchhin sawrkar aia ṭha zawk sawrkâr an duh a. Sawkâr ṭha, Kalphung dik leh nghet pe turin MNF-te a in puahchah mek a ni, a ti bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

LAWNGTLAI

Lawngtlai District-a Pang Zirlai Pawl, General Headquarters Vathuampui chuan zirtirtu aikal chungchanga hmalakna an neihin awmzia a neilo ni a hriain, vawiin khan tiamchin awm lovin School pathum, Chikhurlui Middle School, Chamdur Project RMSA High School leh Chamdur Middle School te an khar.

Pang Zirlai Pawl hruaitute sawidanin, Chamdur Project RMSA(High School ah zirtirtu panga an awm a, pahnih chauh an kal thin a, Mizo zirtirtu phe chu office lamah dah a ni. Middle School pawh zirlai naupang 37 lai neiin zirtirtu pakhat chauhvin a enkawl a, Headmaster hi vawi khat mah school a la rap lo a. Zirtirtu indaih lohna a nasat laia hetia hmundanga dah leh school la kal lo te pawh arang lama sawrkár in an thawhna hmunah dah vat túrin an ngèn a, an ngennain awmzia a nei lo a nih chuan a túl angin hma an lakzui tur thu an sawi.

Chikhurlui Middle School-ah thawktu pathum an awm thin a, pahnihin transfer an dil avàngin pakhat chauh awmin, chu pawh chuan aikal a chhawr a, nikum November thla atangin school vawi khat mah hawn a nih lo niin an sawi bawk.

Pang Zirlai Pawl chuan Mizoram sawrkár chu zirtirtu aikal là te leh an thawhna hmuna vawi khat mah la kal lo te chu an chungah hremna lek túrin an phût tlat tih an sawi bawk.

(Lalnggheta Ralte Lawngtlai PTC)

<><><>

LAWNGTLAI DC

Lawngtlai Bawrhsap Pu Donny Lalruatsanga chuan tunhnaia Social Media lam a darh, Lawngtlai paltlanga Myanmar a luhpuitur bungrua phur luttute ni a ngaihtheihin , Lawngtlai daiah DC hriatpuina a pawisa lo khawn an awm ni a sawi ah inhnamnawihna a neilo tih sawiin, he inpuhna hi an ngaithutak hle tih a sawi.

Lawngtlaia Thuthar thehdarhtute kawmin, DC chuan thil awmdan chhuichiang tura hmalakna kalpui a nih thu leh he inpuhna a mawhphurtu zawng chhuaka an phutawk hremna lek a nihtheih nan hmalakmek a ni a ti a, Lawngtlai Police ten nguntakin an chhui mek a ti.

Lawngtlai Bawrhsap chuan Lirtheia bungraw phur an ni emaw, thildang ah pawh District Administration chuan chhiah laktheihna dan a neilo tih sawiin, Lawngtlai DC lantel theihna turin engmah hetiang lam hawiah hmalakna DC leh DC Office in an neilo tih a sawi bawk.

Video thehdarhah hian Myanmar a phurhluh tur Scooter phur ni a insawi Driver ni a ngaihtheih chuan Lawngtlai bul ah an motor tidingin pawisa chawitir an nih thu leh DC pawhin a hriatpui niin pawisa chawitirtute chuan an sawi niin a sawi.

(Lalnggheta Ralte Lawngtlai PTC)

<><><>

PM

Prime Minister Narendra Modia chuan vawiin khan SCO Summit karlakah Islamic Republic of Iran President Masoud Pezeshkian a kawm a. India leh Iran inlaichinna hrang hrang an sawidun a. Tunhnai West Asia boruak leh buaina thleng meka an ngaihndan an sawidun a. PM Modia chuan inepna boruak intham leh mek chu a ngaih thutak thu leh India chuan inbiakna tha tak neia buaina chinfel a duh thu a sawi a ni. Prime Minister Modia hian Kyrgyz Republic President Sadyr Zhaparov a kawm bawk a. Ram pahnih inlaichinnaa hmasawнна hrang hrang leh thawhdunna tihchangtlun zel dan turte an sawidun a ni.

Prime Minister Modia hian naktukah Shanghai Cooperation Organisation Summit ah hian thu a sawi dawn bawk a ni.

Puan tawh angina Pu Modia hian nizan khan Kyrgyzstan khawpui Bishkek a thleng a ni.

(Newsonair)

<><><>

NEPAL

Nepal tuilian avanga thi zat chu 903 an tling tawh a. Mi 4247 chin hriatlohin an la awm.Nepal National Disaster Risk Reduction and Management Authority sawidanin Pathiannia chin hriatloh zat an puan 2502 aiin a pung leh tawh zawk a. Tuilian tawrhna district pariatah te ruang hmuh chhunzawm zel a ni a. Chhanchhuah hna ngawrh taka thawh mek a ni.

Hetihlai hian hydropower project hna thawh mek leiverha tang mi 933 te chhanchhuah tuma thawh mek a ni bawk.

(Newsonair)

<><><>